



Inatsisartunut ilaasortaq Karl Lyberth, Siumut
MAANI

Maniitsup eqqaani innani timmiaqarfinni timmissanik qaqugu kisitseqqittoqarnissaa pillugu Naalakkersuisunut apeqqummut 62-imut akissut.

Inatsisartut suleriaasianni § 36, imm. 1 malillugu Maniitsup eqqaani innani timmiaqarfinni kisitsisoqarnissaa pillugu apeqquteqarputit. Apeqqutigineqartoq akisussaaffeqarfinit akineqartussatut nassiunneqarpoq.

19. marts 2010
j. nr. 2010-62
Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@gh.gl
www.nanoq.gl

1) Maniitsup eqqaani innani timmiaqarfinni qaqugu kisitseqqittoqassava?

Ad 1) Maniitsup aqutsiviani Taateraaf Appallu piaqqiortut Kalaallit Nunaanni timmissat piaqqiortut nalunaarsuiffimmu Pinngortitaleriffiup 2014 ilanngullugu atuuttussatut suliarisimasaanut ilanngunneqarput. Pilersaarut malillugu timmissat piaqqiortut Maniitsup eqqaaniittut ukiut arfinilikkaarlugit kisinneqartassapput. Taamaallit timmissat piaqqiortut kingullermik kisinneqarput 2003 aamma 2009-mi. 2003-mi kisitsisoqarmat Taateraaf amerlassusii Maniitsup aqutsivianiittut piffissami 1977-2003-mut 50 % qaangerlugit ikileriarsimanerat paasineqarpoq.

Pinngortitaleriffik nalunaarpoq 2009-mi kisitsisoqarmat paasissutissat suliarineqarneri suli naammassineqanngitsut, kisiannili tamatuma naammassineqarnissaa ukiup naannginnerani pissasoq naatsorsuutigineqarluni. Taamaammat massakkorpiaq piniarnerup sivitsorneqarnissaanut tunngavissaqanngilaq.

Ilanngullugu malugeqquneqarpoq Taateraaf piffissaq piniarfiususaaq timmissat pillugit nalunaarummi nutaami ullunik 14-inik allanngortinneqarsimammat siusinnerusukkut 1. september – 28. februar-imit 15. august – 28. februarimut. Tamatumunnga tunngavilersuutaavoq siusinnerusukkut piniarnerup aallartinneratigut timmissanik piaqqanik ukiormi uumaffigisaanni siullermi toqujaartartunik amerlanerusunik pisaqartoqartalnissaa, akerlianillu apeqquteqarnermi siunnersuutaasutut upernaakkut piniarnerup sivitsorneqassagaluarpat annertunerusumik najukkami timmissanik utoqqarnik piaqqiortunik eqquisussaalluni. Taateraaf 4-nik ukioqalereerlutik aatsaat piaqqiortut upernaakkut amerlanerik pisaqartarnissaaq timmissat piaqqiortut ikilerujussuarnerannik kinguneqassaaq.

Naalakkersuisut kissaatigaat kalaallit tunisassiaat sapinngisaq malillugu kalaallit nerisassaannut ilaatinneqartariaqartut, kisiannili aamma piniarnerup nungusaataannngitsumik ingerlanneqassasoq. Tamatumani pisariaqarpoq timmissat ataasiakkaat amerlassusiinut naliliinermik tutsuiginartunik peqartoqarnissaa. Nunarput taamak isorartutigisoq kisitsinermilu aningaasartuutit annertoqisut atorineqartarmata timmissat amerlassusii tamakkerlugit ukiumoortumik kisittarnissaat aningaasatigut periarfissaqanngilaq. Taamaammat pilersaarutit pioreersut nutaallu atorlugit pisuussutit uumassusillit nakkutigineqarnissaanut innuttaasut najukkaniittut

peqataatinneqarnissaat anguniarneqarpoq. Neriutigineqarpoq pilersaarutit sinerissap sinneranut siaruaakkumaartut nungusaataanngitsumillu ingerlatsinissaq tamanut iluaqutaasumik – aamma kinguaariinnut tullinnguuttunut – qulakkeerlugu.

Inussiarnersumik inuulluaqqusillunga

Ane Hansen

Aalisarnermut, Piniarnermut Nunalerinermullu Naalakkersuisoq